

乾隆大藏經



乾隆大藏經



御製

佛光恩照三千大千
恒沙法界普度衆生
身心安泰年時豐稔
日月升恒乾坤清寧
上下樂利中外協和
萬善圓成情與無情
大清雍正十三年四月初八日
隨緣徧滿
悉證菩提
風雨調順
百昌蕃熾
庶物咸亨
同登正覺

第八八册 諸宗部此土著述 (一二一)

佛祖歷代通載 三六卷 (卷一九至卷三六)

百丈清規 八卷 亦名：敕修百丈清規

辯偽錄 六卷

大元至元法寶勘同總錄 一〇卷

楞伽阿跋多羅寶經注解 四卷

般若波羅蜜多心經注解 一卷

金剛般若波羅蜜經注解 一卷

嘉興路大中祥符禪寺住持華亭念常集……………一

大智壽聖禪寺住持臣僧德輝奉敕重編

大龍翔集慶寺住持臣僧大訴奉敕校正……………三八九

元道者山雲峰禪寺沙門祥邁奉敕實錄撰……………五三九

元講經律論沙門慶吉祥等奉詔集……………六三三

宋求那跋多羅奉詔譯

大明天界善世禪寺住持臣僧宗泐

演福講寺住持臣僧如玘奉詔同注……………八三三

唐三藏法師玄奘奉詔譯

大明天界善世禪寺住持臣僧宗泐

演福講寺住持臣僧如玘奉詔同注……………一〇〇三

姚秦三藏法師鳩摩羅什奉詔譯

大明天界善世禪寺住持臣僧宗泐

演福講寺住持臣僧如玘奉詔同注……………一〇〇九

大明仁孝皇后夢感佛說第一希有大功德經

一卷

大明三藏法數 三八卷（卷一至卷八）

明仁孝徐皇后述……………一〇三三

上天竺前住持沙門一如等奉敕集注……………一〇五九

佛祖歷代通載

嘉興路大中祥符禪寺住持華亭念常集



清刻龍藏佛說法變相圖

佛祖歷代通載卷第十九

嘉興路大中祥符禪寺住持華亭念常集

唐

子甲
改興元○是年壽州毛罕妻生子毛債猪
頭象耳騾足魚腮人身鐵杖自鞭金田掃
地償盜常住錢債也南嶽明瓚禪師者不
知何許人也初宰相李泌乾元中辭入衡
嶽瓚隱居上封泌往謁之瓚誦經其聲先
悲悽而後悅豫泌隱知音因謂曰將非避
隱者有雲霄意乎瓚唾之曰莫相賊莫相
賊泌色不爲動瓚久之見泌立候不懈乃
曰飯未泌曰未也瓚撥火出芋食與語久
之辭去瓚撫其背曰好做十年宰相至是
泌感事爲帝言其高行有詔徵之使者至
石窟宣麻命曰尊者起謝恩瓚寒涕垂頤

凝坐畧不以介意使者難其淳正不之迫
回奏其事帝咨美之數四不已瓚著歌一
篇其辭曰兀然無事無改換無事何須論
一段真心無散亂他事不須斷過去已過
去未來猶莫算兀然無事坐何曾有人喚
向外覓功夫總是癡頑漢糧不蓄一粒逢
飯但知嚼世間多事人相趁渾不及我不
樂生天亦不愛福田饑來喫飯困來即眠
愚人笑我智乃知馬不是癡鈍本體如然
要去即去要住即住身披一破衲腳著娘
生袴多言復多語由來轉相悞若欲度衆
生無過且自度莫謗天真佛真佛不可見
妙性及靈臺何曾受熏鍊心是無事心面
是娘生面劫石可移動箇中無改變無事
本無事何須讀文字削除人我本真合箇

中意種種勞筋骨不如林下睡兀兀舉頭
見日高乞飯從頭捋將功用功展轉昏蒙
取即不得不取自通吾有一言絕慮忘緣
巧說不得只用心傳更有一語無過真與
細如毫末大無方所本自圓成不勞機杼
世事悠悠不如山丘青松蔽日碧澗長流
山雲當幙夜月爲鈎卧藤蘿下塊石枕頭
不奉天子豈羨王侯生死無慮更復何憂
水月無形我常只寧萬法皆爾本自無生
兀然無事坐春來草自青

荆溪湛然禪師臨終告其徒曰大道無方
無體生歟死歟其旨一貫吾歸骨此山報
盡今夕聊與汝等談道而決夫一念無相
謂之空無法不備謂之假不一不異謂之
中在凡爲三因在聖爲三德藝姪則初後

同相涉海則淺深異流自利利人在斯而已爾其志之言訖而化翰林梁肅題其碑陰曰聖人不興必有命世者出焉自智者以法付灌頂頂再世而至左溪朗道若昧待公而發乘此寶乘煥然中與其受業身通者三十有九人而縉紳先生高位崇名屈體受教者數十師嚴道尊遐邇歸仁自丑非命世亞聖曷以臻此改貞元

寅二年翰林梁肅修天台止觀論成著止觀統例曰夫止觀何爲也導萬化之理而復於實際者也實際者何也性之本也物之所以不能復者昏與動使之然也照昏者謂之明駐動者謂之靜明與靜止觀之體也在因謂之止觀在果謂之智定因謂之行果謂之成行者行此者也成者證此者

也原夫聖人有以見惑足以喪志動足以失方於是乎止而觀之靜而明之使其動而能靜靜而能明因相待以成法即絕待以照本御大車以禦正乘大事而總權消息乎不二之場鼓舞於說三之域至微以盡性至順而體神語其近則一毫之善可通也語其遠則重玄之門可闕也用至圓以圓之物無偏也用至實以實之物無妄也聖人舉其言所以示也廣其目所以告也優而柔之使自求之擬而議之使自至之此止觀所由作也夫三諦者何也一之謂也空假中者何也一之目也空假也者相對之義中道也者得一之名此思議之說非至一之旨也至一即三至三即一非相舍而然也非相生而然也非數義也非

強名也自然之理也言而傳之者迹也理謂之本迹謂之末本也者聖人所至之地也末也者聖人所示之教也由本以垂迹則爲小爲大爲通爲別爲頓爲漸爲顯爲秘爲權爲實爲定爲不定循迹以返本則爲一爲大爲圓爲實爲無住爲中爲妙爲第一義是一三之蘊也所謂空也者通萬法而爲言者也假也者立萬法而爲言者也中也者妙萬法而爲言者也破一切惑莫盛乎空建一切法莫盛乎假究竟一切性莫大乎中舉中則無法非中自假則何法非假舉空則無法不空成之謂之三德修之謂之三觀舉其要則聖人極深研幾窮理盡性之說乎昧者使明塞者使通通則悟悟則至至則常常則盡矣明則照照

則化化則成成則一矣聖人有以彌綸萬法而不差旁薄萬劫而不違盡載恒沙而不有復歸無物而不無寓名之曰佛強號之曰覺究其旨鮮脫自在莫大極妙之德乎夫三觀成功者如此所謂圓頓者非漸次非不定指論十章之義也十章者恢演始末通道之關也五畧者舉其弘綱截流之津也十境者發動之機立觀之諦也十乘者妙用所修發行之門也始於正觀而終於見境者義備故也闕其餘者非修之要也乘者何也載物運者也十者何也成載之事也知其境之妙不行而至者德之上也乘一而已豈藉夫九哉九者非他相生之說未至者之所踐也故發心者發無所發安心者安無所安徧破者徧無所破

爰至餘乘皆不得已而說也至於別其義例判為章日推而廣之不為繁統而簡之不為少如連環不可解也如貫珠不可雜也如懸鏡不可掩也如通川不可遏也議家多門非諱論也按經正義非虛說也辯四教淺深事有源也成一事因緣理無遺也噫止觀其救世明道之書乎非夫聖智超絕卓爾獨立其孰能為乎非夫聰明深達得意思象其孰能知乎今之人乃專用章句文字從而釋之又何疎漏耶或稱不思議境與不思議事皆極聖之域等覺至人猶所未盡若凡夫生滅心行三惑浩然於言說之中推上妙之理是猶醯鷄而說大鵬夏虫之議層冰其不可見明矣今止觀之說文字萬數廣尋果地無益初學豈

如暗然自修功至自至何必以早計為事乎是大不然凡所謂上聖之域豈隔闕遠負與凡境杳絕與是惟一性而已得之謂悟失之謂迷一理而已迷而為凡悟而為聖迷者自隔理不隔也失者自失性不失也止觀之作所以離異同而究聖神使群生正性而順理者也正性順理所以行覺路而至妙境也不知此教者則學何所入功何所施智何所發譬如無目昧于日月之光行於重險之處顛踣墮落可勝已乎噫去聖久遠賢人不出庸昏之徒含識而已致使魔邪詭惑諸黨並熾空有云云為坑為窞有膠於文句不敢動者有流於滯浪不能住者有太遠而甘心不至者有太近而我身即是者有枯木而稱定者有竅

號而稱慧者有奔走非道而言權者有假
於鬼神而言通者有放心而言廣者有罕
言而為密者有齒舌潛傳而為口訣者凡
此之類自立為祖繼祖為家反經非聖昧
者不覺仲尼有言道之不明也我知之矣
由物累也悲夫隋開皇十八年智者去世
至皇朝建中垂二百載以斯文相傳凡五
家師其始曰灌頂其次曰縉雲威又其次
曰東陽小威又其次曰左溪朗公其五曰
荆溪然公須於同門中慧解第一能奉師
訓集成此書蓋不以文辭為本故也或失
則繁或得則野當二威之際緘授而已其
道不行天寶中左溪始弘解說而知者蓋
寡荆溪廣以傳記數十萬言網羅遺法勤
矣備矣荆溪滅後知其說者適三四人古

人云生而知之者上也學而知之者次也
困而不學又其次也夫生而知之者蓋性
德者也學而知之者天機深者也若其嗜
欲深耳目塞雖學而不知斯為下矣今夫
學者內病於蔽外役於煩沒世不能通其
文數年不能得其益是則業文為之屢校
楮足也焚句為之簸糠眯目也以不能之
師教不領之弟子止觀所以未光大於時
也予常戚戚於是整其宏綱撮其機要其
理之所存教之所急或易置之或引伸之
其義之迂其辭之鄙或難除之或潤色之
大凡浮疎之患十愈其九廣略之宜三存
其一於是祛鄙滯導蒙懂貽諸他人則吾
豈敢若同見同行且不止觀罪我亦無
隱乎爾建中上元甲子首事筆削三年歲

在析木之津功畢云爾

辰戌

般若三藏新譯大乘理趣六波羅蜜經成

代宗皇帝親製叙文曰大朴既散有為遂

作名利牽乎德巧智喪乎真愛惡攻乎性

情因緣堅其染習內則百慮無節外則六

根競誘天理滅而莫知道源迷而忘返淪

溺苦海劫盡還初惟至人了萬物之宗越

三界之表廓獨立而不改徧諸有而常然

故能開導群迷濟拔流品六波羅蜜經者

衆法之津梁度門之圓極也昔日月燈明

如來為菩薩說歷劫曠遠真偈寂寥文殊

師利於耆闍會中與彌勒菩薩語及其事

成一切種智會無量義因唯佛能知唯佛

能說教必有主其在茲乎是以釋迦如來

為法而生俟時而現三身不異故處代而

常離萬行無修故隨方而自在運慈悲之

力開攝護之門因其六塵示之六度導於

法分全證法身結習紛綸乘理而悟是真

般若之旨也故有慈氏善問大音讚言天

垂寶花雲集仙蓋甘露流液光明燭幽使

迷方淺深皆得自然之慧恒沙億衆能通

般若之知嘗試論之先儒有言誠者自成

而道自導也夫誠已於內則不勉而中不思

而得誠物於外則不言而應不為而成其

內者證法之身其外者大悲之力德產之

致密化育之功也夫春風吹發萬類咸滋

旭日升晝群陰盡釋乾坤易簡之道是則

大同神明幽贊之情孰云區別殊途一致

其理固然朕虔奉丕圖保乂烝庶思建皇

極以升大猷遐想靈蹤期於叶契舍城妙

說久秘梵文徒懷瀉瓶未啓遺夾微言不昧將或起予於是罽賓沙門般若受旨宣揚光宅沙門利言爲之翻譯時大德則資聖寺道液醴泉寺超悟慈恩寺應真莊嚴寺圓照光宅寺道岸等法門領袖人中龍象證明正義輝潤玄文知釋迦之寶城識衆尊之滿字以貞元四年歲次戊辰十二月二十八日於西明寺譯成上進凡一部十卷神龍翊衛如從金口之傳梵衆護持無異毫光之現朕齋心滌慮仰味宗源聞所未聞寔為希有聊因暇日三復斯經雖法海甚深波流不讓舉其梗槩昭悟將來二月江西馬祖大師道一示寂師漢州什邡人姓馬氏容貌豐偉牛行虎視引舌過準足有二輪文遇懷讓禪師密契心法始

自建陽遷臨川次南康所至聚徒說法初建禪林大曆中始居豫章開元寺嘗示衆曰汝等諸人各信自心是佛此心即佛達磨大師自南天竺國來此中華傳上乘一心之法令汝等開悟又引楞伽經文以印衆生心地恐汝顛倒不自信此一心之法各各有之故楞伽經云佛語心為宗無門為法門又云夫求法者應無所求心外無別佛佛外無別心不取善不取惡淨穢兩邊都不依怙達罪性空念念不可得無自性故故云三界唯心森羅及萬像一法之所印凡所見色即是見心心不自心因色故有但隨時言說即事即理都無所礙菩提道果亦復如是於心所生即名為色知色空故生即無生着了此意乃可隨時著

衣喫飯長養聖胎任運過時復有何事汝
受吾教聽吾偈曰心地隨時說菩提亦只
寧事理俱無礙當生即不生師於開元示
寂先是師嘗經由豫章泐潭之石門愛其
山水奇勝洞壑平坦顧謂其從曰吾朽質
之日歸骨于此至是門弟子奉靈骨舍利
建道場于石門相國權德輿為之碑宣宗
賜謚大寂禪師得法弟子凡百三十有九
人各為一方宗主轉化無窮禪宗至此大
盛于世

大珠惠海禪師者建州人初參馬祖祖問
從何處來曰越州大雲寺來祖曰來此擬
須何事曰來求佛法祖曰自家寶藏不顧
拋家散走作什麼我這裏一物也無求什
麼佛法師遂禮拜問那箇是惠海自家寶

藏祖曰即今問我者是汝寶藏一切具足
更無欠少使用自在何假向外求覓師於
言下自識本心不由知覺禮謝畢服勞久
之後以受業師年老歸奉養乃晦迹藏用
外現癡訥撰頓悟入道要門一卷為好事
竊出及馬祖見之即告衆曰越州有大珠
圓明光透自在無遮障處也衆中有知師
本姓朱者遂共尋訪師由是道望顯著說
法波翻海湧浩然無礙有頓悟門及廣語
行于世

庚午
迎佛骨

六年石頭希遷禪師示寂師得法於清原
天寶中居衡山南寺寺東有石其狀如臺
乃結庵其上時號石頭和尚南嶽鬼神多
見身聽法師皆與之授戒大曆中江西主

大寂湖南主石頭徃來憧憧並湊二大士之門嘗示衆曰吾之法門先佛傳授不論禪定精進唯達佛之知見即心即佛心佛衆生菩提煩惱名異舛一汝等當知自己心靈體離斷常性非垢淨湛然圓滿凡聖齊同應用無方離心意識三界六道唯自心現水月鏡像豈有生滅汝等知之無所不備師初閱肇論云會萬物爲已者其唯聖人乎遂豁然曰聖人無已靡所不已因著叅同契其辭曰竺土大仙心東西密相付人根有利鈍道無南北祖靈源明皎潔枝派暗流注執事元是迷契理亦非悟門門一切境回互不回互回而更相涉不爾依位住色本殊質像聲元無樂苦暗合上中言明明清濁句四大性自復如子得其

母火熱風動搖水濕地堅固眼色耳音聲鼻香舌鹹醋然依一一法依根葉分布本末須歸宗尊卑用其語當明中有暗勿以暗相遇當暗中有明勿以明相觀明暗各相對比如前後步萬物自有功當言用及處事存函蓋合理應箭鋒拄承言須會宗勿自立規矩觸目不會道運足馬知路進步非遠近迷隔山河固謹白叅玄人光陰莫虛度

百癸

○張滂請稅茶得錢四十萬緡茶稅之始

也

子丙

十二年宣河東節度使禮部尚書李詵備禮迎法師澄觀入京觀至有旨命同闕賓三藏般若翻譯烏茶國所進華嚴後分梵夾帝親預譯場一日不至即差僧寂光依

僧欲云皇帝國事因緣如法僧事與欲清淨觀承睿旨翻宣既就進之帝命開示華嚴宗旨群臣大集觀陞高座曰我皇御宇德合乾坤光宅萬方重譯來貢東風入律西天輸越海之誠南印御書北闕獻朝宗之敬特回明詔再譯真詮光闡大猷增輝新理澄觀顧多天幸欽屬盛明奉詔譯場承旨幽贊抃躍兢惕三復竭愚露滴天池喜含百川之味塵培華岳無增萬仞之高極虛空之可度體無邊涯大也竭滄溟而可飲法門無盡方也碎塵刹而可數用無能測廣也離覺所覺朗萬法之幽邃佛也芬敷萬行榮耀衆德華也圓茲行德飾彼十身嚴也貫攝玄微以成真光之彩經也總斯七字為一部之宏綱將契本性非行

莫階故說普賢無邊勝行行起解絕智證圓明無礙融通現前受用帝大悅賜觀紫方袍號教授和尚其後相國齊抗鄭餘慶高郢請撰華嚴綱要三卷相國李吉甫侍郎歸登駙馬杜琮請述正要一卷又為南康王韋臯相國武元衡著法界觀玄鏡一卷僕射高崇文請著鏡燈說文一卷司徒嚴綬司空鄭元刺史陸長源請撰三聖圓融觀一卷節度使薛華觀察使孟簡中書錢徽拾遺白居易給事杜羔等請製七處九會華嚴界圖心鏡說文十卷又與僧錄靈邃大師十八首座十寺三學上流製華嚴圓覺四分中觀等經律論關脉三十餘部皆古錦純金隨器任用云

卯巳

十五年清涼受鎮國太師號進加天下大